

摘藻堂四庫全書薈要

集部

欽定四庫全書薈要

御定歷代題畫詩類卷五十目錄

閒適類

荅東陽于令涵碧圖詩

唐劉禹錫

題瑞安宰朱元成乃祖雲壑莊圖

宋陳傅良

和靖州判官陳子從山水圖十韻

宋魏了翁

跋王介甫遊鍾山圖

宋張栻

題萍鄉何叔萬雲山

宋戴復古

申應時以圖尋山圖所載湖之西溪也爲作絕句

宋沈與求

王學士熊岳圖
元元好問

方壺作遊山圖
元虞集

張令鹿門圖
元虞集

吳伯招紅蓮綠幕圖歌
元黃鎮成

崔旭行之雲巢圖贈道士俞剛中請余賦長歌
元

張翥

題周鍊師雲崖圖

元黃潛

兵部危太樸郎中家於臨川雲林山上請方方壺

作雲林圖太樸索詩賦此

元成廷珪

方方壺道士爲危太樸畫雲林圖

元吳師道二首

書雲林圖

明呂敏

題頤菴胡祭酒先生玉筍白雲圖卷

明夏原吉

題山行圖

宋陳造

跋葛子固題蘇道士江行圖

宋楊萬里

張彥遠江行八詠圖

元元好問

秋山訪友圖

元王惲二首

江邨訪友圖

元王惲

題溪山訪友圖

元馬臻

秋林會友圖

明史鑑

溪橋獨步圖

元元好問二首

題湖山獨步圖

元丁鶴年

題葉容齋湖山獨步圖

元張庸

清溪散步圖

明沈周

江郊晚步圖

明李日華

寫溪山緩步圖

明李日華

竹溪夢遊圖

元元好問

梅溪圖

元袁桷

題松溪圖

元黃潛

題松溪小隱圖

元張庸

劉伯熙清溪圖

元黃鎮成

王叔明爲姚子章林泉清話圖 元黃公望

茂松清泉圖 明陳琛

題李庭訓所藏雅集圖 元元好問二首

題梵隆古畫雅集圖 元王惲

題雪堂雅集圖 元王惲

玉堂燕集圖 元虞集

題雅集圖 元吳澄

次楊鐵崖賦張叔厚所繪玉山雅集圖韻 元顧瑛

金碧山水春堂宴賓圖

元程鉅夫

玉堂閑適圖

元王惲

跋西蒲老人燕處圖

元王惲

題米元暉忘機圖

元程鉅夫

悠然圖

元張翥

抱素子作自適圖求題

元張翥

道山高逸圖

明沈周

題養逸圖

明文徵明

題李德瞻壁間相看不厭圖

元楊翀

鳳臺三益圖

明高啓

題振衣千仞岡圖

明沈周

欽定四庫全書薈要卷一萬九千一百五十八

集部

御定歷代題畫詩類卷五十

閒適類

荅東陽于令涵碧圖詩

并引

唐劉禹錫

東陽令于興宗丞相燕國公之猶子生綺襦紉袴間
所見皆貴盛而恣然有心如山東書生前年白有司
願爲新民官以自効遂補東陽及蒞官以簡易爲治
故多暇日一旦於縣五里偶得奇境埋沒於翳薈中

于生自以有特操而生於公侯家由覆廕入仕常忽
忽歎息因移是心開挾泉石芟去蘿蒿斧凡材畚息
壤而清溪翠巖森立坐來因構亭其端題曰涵碧碧
流貫於庭中如青龍蜿蜒冰激射人樹石雲霞列於
前昏旦萬狀惜其居地不得聞於時故圖之來乞詞
既無負尤物予亦久翳蘿蒿者睹之慨然遂賦七言
以貽後之文士

東陽本是佳山水何況曾經沈隱侯化得邦人解吟咏

如今縣令亦風流
新開潭洞疑仙境
遠寫丹青到雍州
落在尋常畫師手
猶能三伏凜生秋

題瑞安宰朱元成乃祖雲壑莊圖

宋
陳傅良

功成不受富貴汙輕舟
翩然下五湖至今風流在姑蘇
我復見此雲壑圖
兩坡喬木樛相扶
殘山剩水千里餘
天際未知何有無
一葦橫絕霜風蒲
楊花春岸秋蓴鱸
在在著此儒仙臞
世無宗師貌不如
誰其嗣之吾大夫

和靖州判官陳子從山水圖十韻

宋 魏了翁

予遷靖州判官陳子從珪爲鄰嘗從容出示靈竹僧
不二山水圖其末有乃祖乃父十詩前賢風裁邈不
可及取次原韻以識高山景行之仰云

彭蠡歸舟

外物羈縻人無退亦無遂
媿彼自由身朝發而夕至

山堂曠望

山堂有何觀四時互興歇萬物隨天根東生復西滅

重湖泛月

水月皆內景入秋倍清輝世無善觀者滔滔吾誰歸

星灣晚酌

士非耕釣者而從蓑笠翁人生貴適意莘渭亦時中

雨後觀瀑

澤氣蒸前山起自膚寸微競看千丈瀑不悟片雲飛

松徑晚步

松柏不受凋此亦易知耳須看竹有筠與松相表裏

谿上賦詩

莫作流看谿天命無窮已詩人若知得千古可坐致

林下避暑

散髮避炎暑炎暑苦相尋云何對大賓不見汗沾襟

載酒尋梅

松竹貫寒暑而梅時往來不知復姤意隨人漫徘徊

雪中訪友

懷人得清晤此樂浩無期剡谿興盡返未喻伐木詩

跋王介甫遊鍾山圖

宋張栻

林影溪光靜自如蕭疎短鬢獨騎驢可能胸次都無事
擬向山中更著書

題萍鄉何叔萬雲山

詩人姚仲同乃胡仲方詩友

宋戴復古

拄杖穿雲去一坡仍一坡地高山不峻花少竹還多家
近登臨便人賢氣味和能詩老姚合朝夕共吟哦

申應時以圖尋山圖所載湖之西溪也爲作絕句

宋
沈與求

王維買宅先成畫申子尋山亦載圖他日真能營小築
此山佳處著儂無

王學士熊岳圖

元
元好問

洗參池水甜於蜜玉堂仙翁髮如漆膝前文度更風流
盡卷風流入詩筆長松手種欲摩天海岳樓空落照邊
古來說有遼東鶴仙語星星難爲傳五百年間異人出

却將錦繡裹山川

方壺作遊山圖

元虞集

身在山中底用圖偶然點染出方壺數株古樹雲連屋
一箇橫橋水滿湖門外從教車馬過鐺中不計稻粱儲
等閒真遇尋師者指與雲間一翠渠

張令鹿門圖

元虞集

張侯襄陽人深知襄陽樂十年宦學懷襄陽故託毫緜
寫山郭老我不樂思蜀都人言嵩陽好隱居三十六峰

常對面水竹田廬還可圖
欲往不能心慄慄忽見新圖
被山惱沙禽浦樹俱可人
金澗石牀爲誰好向來耆舊
皆英雄駕言從之道焉從采珠
月冷識遊女沈劒潭深
知臥龍八月霜晴水清淺
聞道扁舟足迴轉何時古寺
傍檀溪幾處殘碑在江峴
呼鷹臺高秋草多養魚池中
蓮芡波蜀蒿未必不如此
我今不遊奈老何張侯張侯
早結屋莫待史詹爲君卜
要看隴上課兒耕好在魚梁
白沙曲

吳伯招紅蓮綠幕圖歌

元黃鎮成

烏君之山從西來拔地萬仞青崔嵬
劃然磅礴下江潁
林麓隱隱棲樓臺上有飛蘿壘喬木下有洪濤萬頃堆
紅蓮綽約泛渚淨綠幕縹緲臨湖開雲烟捲風島嶼沒
窗戶洗雨冰霜回高人自是青雲客日向湖亭賞山色
昔年走馬踏紅塵射殺南山雙白額今日綸巾羽扇閑
獨面清泠飲冰蘂壺箭收投勝負空碁枰罷局機籌息
延陵公子昔稱賢畫手復見今道玄有聲之畫宜詩篇

爲子作詩將畫傳

崔旭行之雲巢圖贈道士俞剛中請余賦長歌

元張翥

崔郎習次奇突兀興來從人索紙筆斯須千峰萬峰出
底用一石畫五日上饒道人列仙臞示我新作雲巢圖
塗嵐抹霧思更逸古色滿眼蒼寒俱重溪疊谷各異狀
壞木崩石森相向翠微最上雲所棲道人又在雲之上
數椽丹室蔭白茅團團雲間如一巢拂衣拂著宿鶴背

挂劍挂落長松梢空濛杳靄迷處所豈復漂搖畏風雨
既非鳥巢老衲子無乃中林古巢父填牕擁戶晝不開
神光隱見金銀臺雲中君子鳳爲馬徃徃玉簫吹月來
道人幾年遊上國賣藥壺中人不識洞玄宮館一黍珠
靈秀似與仙都敵故巢未破歸便得歸到玉山多美石
我詩好刻附此圖留照千秋山水碧

題周鍊師雲崖圖

元黃潛

我本山中牧羊客偶然失脚紅塵陌矯首丹崖不可攀

但見層空暮雲碧樓居仙人元不死天長地久無消息
騎麟翳鳳者爲誰道上相逢不相識披圖示我舊游處
流水桃花尚春色爲言白石久已爛茯苓無復成琥珀
忽然長揖不肯住飄若流星去無迹若爲握手賦歸來
永與人間風雨隔

兵部危太樸郎中家於臨川雲林山上請方方壺
作雲林圖太樸索詩賦此

元成廷珪

宇宙有此雲林山三十一峰如髻髮雲林先生讀書處

長松芝草非人間白雲裁衣亦自足青精製飯何曾慳
朝光空濛起舒眺人迹迴絕窮躋攀青天蕩蕩海月出
照見先生冰雪顏惟有方壺契幽眇貌得彷彿來塵寰
宮中聖人正問道布衣召入蓬萊班玉堂給札縱揮灑
金匱啓鑰煩修刪於今聽履上霄漢聖人未放先生還
山中喪亂復何有飛瀑落澗空潺湲青林鳥啼野花發
白晝虎嘯松風閒朝廷宴坐見圖畫亦應懷我雙佩環
方壺生在何處何不同來玉京住魚龍夜落河漢秋却

泛靈槎共歸去

方方壺道士爲危太樸畫雲林圖 二首

元 吳師道

挹樸先生學大還偶然爲客未歸山
迎陽坊裏看圖罷
夢遶白雲青樹間

海上三山樓觀開壺仙
早晚御風回畫成定勝人間境
爲問何因寄得來

書雲林圖

明 呂 敏

葱蒨夏林綠高齋方夕曛幽花垂泣露遠岫斂歸雲停
簫風初至移樽酒半醺明朝憶佳賞回首念離羣

題頤菴胡祭酒先生玉筍白雲圖卷

明
夏原吉

頤菴先生古君子德行文章當世美晨攜玉筍白雲圖
訪我金臺官署裏自言先世多遺德卜居遠在金川側
何處最稱奇玉筍岩堯插天極雲開幾朶芙蓉青雨餘
百道銀潢傾陰巖月冷玉龍蟄陽坡春暖金牛耕蕭家

峽口尤奇麗狀若飛鷺舞空際泥江堅挹伏虎形瓦橋
重展遊龍勢龍騰虎伏勢若何先隴正在山之阿林鳥
泣雨下喬木野猿叫月懸春蘿時因宦轍方驅涉未暇
栖栖理家牒聊憑縑素寄遐思用詔兒孫知祖業願君
移孝忠吾皇致時熙皞超虞唐白頭稽首謝丹闕清風
一櫂歸湖鄉晝看不厭夜復臥玉筍千古長蒼蒼

題山行圖

宋陳造

溪山無處著纖塵翠壁蒼漪襯月痕可惜人間清絕地

葦間漁父與平分

跋葛子固題蘇道士江行圖

宋楊萬里

江行圖上指君山寄語烟波不用看
丞水買船歸雪水
全家搬入畫圖間

張彥遠江行八詠圖

元元好問

楚江平浸楚山流
放眼江山得意秋
一寸霜毫九雲夢
合教轟醉岳陽樓

秋山訪友圖

二首

元王惲

瀟瀟楓葉映青山詩在風烟紫翠間
早晚得歸林下去
一溪秋水伴君閒

關峙石樓連佛屋灘橫八節走清伊
杖藜多是香山老
斜日青山獨徃時

江邨訪友圖

元王惲

兩椽茅屋枕江濱杖屨來敲月下門
不是愛梅多看竹
冷香疎影坐黃昏

題溪山訪友圖

元馬臻

溪風吹長松石路秋影薄下有尋幽人支筇注林壑良
朋渺何許雜樹森草閣畫師發天機筆底氣參錯我昔
事扁舟頗識山水樂於今日月駛此景亦蕭索愧乏買
山資老負宿昔諾展卷令人嗟高歌激寥廓

秋林會友圖

明史鑑

青山巖凝紫霞飛泉如虹飲渥洼楓林接葉紅於花
上有鸞鶴下麇麇玉樓珠箔仙人家仙人顏色長美好
瑤池桃花得春早門前石楠秋葉香滿地綠雲風不掃

有客來遠方驅車涉羊腸車聲到門止揖讓升高堂高
堂奕奕凌雲漢瑤爵金盤青玉案華燈煌煌照宴嬉漢
女湘妃出帷幔浮雲不行天欲低回風動地飛花亂悲
歡離合樂未央起視明星夜將半夜將半舞且歌發激
楚奏陽和巧笑兩頰生微渦蛾眉曼睩光騰波平生樂
事良蹉跎對此轉覺哀情多明朝忽驚雙鬢皤其奈流
光如箭何

溪橋獨步圖

二首

元
元好問

納納溪橋逗晚風水村山閣往來通馬蹄踏遍紅塵路
畫裏初逢避俗翁

胸次江山老更奇太初元氣入淋漓仙翁不是人間客
俗筆休將比郭熙

題湖山獨步圖

元
丁鶴年

杖屨湖山外悠然與世違水邊延月上巖際待雲歸隨
鹿過樵徑看鷗到釣磯只今瞻畫像猶想挹清輝

題葉容齋湖山獨步圖

元
張庸

孤山不及青山好東湖勝似西湖幽每策烏藤過林麓
還逐白雲來水頭人家遠近即三島身世古今同一漚
我亦明朝脫塵鞅袖攜風烟從爾遊

清溪散步圖

爲徐文序作

明沈周

老去山翁空世情偶因溪好獨閒行高歌激物鳥忽語
樂事會心人不爭露氣溢花沾濕好風瀾當日動搖明
臨流愛濯無塵濯青布披巾况沒纓

江郊晚步圖

明李日華

江影清醉顏沙光晃晴目石崖巖蔥樹野岸蕭騷竹散步自成趣何須苦吟矚有人贈山疏我懶未能讀

寫溪山緩步圖

時甲子夏五
積雨乍晴

明

李日華

山留碧影鎮玻瓈雲泛珠叢貼梁魚尾魚吞花落片翠翎鳥掛柳垂枝茶經筆訣閒相校酒諾文逋每費思溪雨乍晴莎地暖破苔雙屐自尋詩

竹溪夢遊圖

元

元好問

意外荒寒下筆親經營慘澹似詩人何時萬頃風烟裏

白髮刁騷一幅巾

梅溪圖

元 袁 桷

玉人楚楚意逍遙
隔水攜琴不受招
回首芳林真嫵媚
春風歌館聽吹簫

題松溪圖

元 黃 潛

獨騎瘦馬走赤日
忽對畫圖雙眼明
想見高人茅屋底
石牀臥聽松風聲
秋風漸高霜露白
松根茯苓已堪食
鬱紆遲暮祇自憐
卷圖還客三歎息

題松溪小隱圖

元張庸

有客松溪獨歸隱紅塵不染芙蓉裳溪流遶屋河漢落
松葉墮階風露涼山樽時浮琥珀色地爐還煮茯苓香
人生只合老丘壑濯足我亦歌滄浪

劉伯熙清溪圖

元黃鎮成

暫脫塵鞅繫結此清溪居偶從農圃鄰時讀種樹書聽
瀑埽松石眠雲依草廬韜琴自無絃直釣不在魚未知
穹壤間寵辱當何如

王叔明爲姚子章林泉清話圖

元黃公望

霜楓雨過錦光明
澗壑雲寒暝色生
信是兩翁忘世慮
相逢山水自多情

茂松清泉圖

爲潘東崖賦

明陳琛

逍遙谷裏自容身
此老當年亦識真
白眼那堪常對客
青山終是不生塵
微風入樹琴清耳
積石明泉玉可人
都付東崖長作主
多應惜我往來頻

題李庭訓所藏雅集圖

二首

元元好問

萬古文章有至公百年奎壁照河東
衣冠忽見明昌筆更覺升平是夢中

景星丹鳳一千年合著丹青與世傳
誰畫風流王李郝大河南望淚如川

題梵隆古畫雅集圖

係內府畫上有紹興誌今爲霍清甫家藏

元王惲

龍章紅爛紹興文入手休驚玉椀新
奎壁細看輝映處半爲元祐黨中人

題雪堂雅集圖

元王惲

擾擾黃塵若箇閑
禪房來結靜中緣
機鋒爲愛靈師峻
樽酒同傾繡佛前
談麈風清穿月窟
雨花香細颺茶烟
應慚十九人中列
開卷題詩又五年

玉堂燕集圖

元虞集

朝廷多暇日
別館又青春
薄醉猶催酒
清歌況有人
玉堂金硯匣
翠袖白綸巾
老去渾無賴
憑誰爲寫真

題雅集圖

元吳澄

官清無事足優游
下馬長楸作勝遊
濟濟衣冠唐盛世
諸賢不減晉風流

次楊鐵崖賦張叔厚所繪玉山雅集圖韻

元顧瑛

詩人得句題茅屋
客子乘流泛小舫
老眼看花起春霧
醉眠聽雨響秋濤
弓盤舞按銀鵝喙
水調聲傳金鳳槽
與爾共傾千日酒
呼童却換五雲袍

金碧山水春堂宴賓圖

元程鉅夫

青山偏宜春晝觀日射樓閣飛雲烟鷓鴣斑間鸚鵡綠
黃金榴映白玉闌高堂四面山回抱把酒看山終不到
嶄然屹立見全身堂上何如山上好衆人之樂爲主人
誰知主樂因嘉賓野風澹蕩天氣美一草一木皆精神
小李將軍誇好手休道今人世無有他年人展此圖看
小臣作詩同不朽

玉堂閒適圖

元
王 惲

醉岸烏紗殿影東宮花低映酒波紅興來草罷長楊賦

獨占高槐灑晚風

跋西蒲老人燕處圖

元王惲

甫脫孤城百戰危，蒼茫何處跨鯨歸。
百年有感悲風樹，一旦無依足孝思。
遺像儼然留故事，寸心聊擬荅春輝。
遠遊剩袖如瓜棗，海岳相逢會有期。

題米元暉忘機圖

元程鉅夫

扁舟輕不渡，斷岸斜初轉。
白鳥波上閒，青山意中遠。
已知江湖落，還驚歲年晚。
海翁那有機，相忘自應遣。

悠然圖

爲鄭處士作

元張翥

鄭子林居好遙希靖節賢
看山秋色裏把酒菊花前
人境殊多事吾廬自一天
能知此中意何處不悠然

抱素子作自適圖求題

元張翥

隱者抱幽素獨行穿杳冥
有時吟木客無駕勒山靈
寒澗流沙白秋雲入竹青
攜琴向何處彈與野猿聽

道山高逸圖

贈勿齋林郡博

明沈周

道山遊息處博士樂孤高
天地安亭子詩書耗鬢毛
衆

花承白日芳草共青袍
載酒欲相伴浮生嗟自勞

題養逸圖

明文徵明

書卷茶鑪百慮融
夢回午枕竹牕風
忙身見畫剛生魄
安得身閒似畫中

題李德瞻壁間相看不厭圖

元楊翀

窓前圖畫勝玄關
怪石長松九夏寒
寄語山靈休厭客
清風明月好相看

鳳臺三益圖

明高啓


謫仙昔作供奉臣詩語不合妃子嗔鑾坡無地容待直
錦袍來醉金陵春金陵臺高鳳凰去西望長安竟何處
江聲空打石城潮山色猶橫歷陽樹騎鯨一去五百秋
花草滿徑理春秋瀛洲老客綠玉杖笑領賓客還來遊
才氣風流頗同調曾入金門待明詔當年流落不自悲
却問前人欲相弔可憐二子遭清時放逐江海空題詩
賴有高名足難朽何用粉墨他年垂夕陽闌檻登臨後
誰復來遊酹杯酒履痕寂寞隱蒼苔棲鳥啼滿臺前柳

題振衣千仞岡圖

明 沈周

陽岡振新浴，爽氣與秋通。
鶴氅照片雪，鳳翎開太空。
乾坤兩長袖，塵土一冷風。
熱惱下方路，何人高蹈同。

御定歷代題畫詩類卷五十



總校官庶吉士臣侍朝

校對官編修臣裴謙

謄錄舉人臣洪道濟

欽定四庫全書薈要

集部

御定歷代題畫詩類卷五十一

二

欽定四庫全書薈要

御定歷代題畫詩類卷五十一目錄

閒適類

題茂安兄藏春圖 宋范浚

展子虔遊春圖卷 元張珪

展子虔遊春圖 明宋濂

春遊圖 明卞榮

題春日玩芳圖 明汪廣洋



園池春晚圖

明楊慎

家藏馬遠春山行樂大幅

明祝允明

春園圖

明廖道南

一徑野花落孤舟春水生畫

明張寧

春野圖

明徐渭

題朝元宮劉道人秋聲圖

元王惲二首

山樓秋望圖

元吳師道

萬港秋汎圖

元張翥

題馮文仲畫秋亭野望

元姚文奐

題王明府歷下秋興圖

明汪廣洋

謝庭循自畫秋景

明王直

倪雲林秋林野興圖

明吳寬

聽秋圖

明謝承舉

李學士薇園秋霽圖題贈

明嚴嵩

題東嵐秋思

明李叔玉

題李將軍四時行樂圖

明丘濬四首

衍聖公四景畫 明程敏政四首

題蕭彥祥四景圖 明薛綱二首

題潘閬夜歸圖 金密公靖

吹笛圖 元虞集

孤舟橫笛 元王惲

蘆汀夜笛圖 明金幼孜

橫笛圖 明劉泰

題老嫗騎牛吹笛圖 明宮人范氏

題江南烟雨騎驢圖 元何中

題畫扇騎驢踏雪 元陳深

雪騎圖 元程鉅夫

題劉凝之騎牛圖 明戴良

劉凝之騎牛圖 明高啓

題停車圖 明張鳳翼

曉起圖 明唐寅

閣下觀竹筍圖 宋孔武仲

題僧法傳爲沈仲一畫聽松圖 宋陳傅良

聽松圖 元張憲

溪行看松圖小卷 明李日華

跋張龍丘簪花圖 元王惲

雪樓探梅圖 元程鉅夫

種柳圖 元楊載

觀桃圖 明姚綬

題金華宗原常雙溪洗藥圖 明吳溥

採芝圖

明張泰

白雲深山掘芝者

明徐渭

羣兒春嬉圖

明陳洪謨

童戲圖

明倪謙

題管夫人山樓繡佛圖

明邢侗

題月夜送花圖

明陳繼儒

欽定四庫全書薈要卷一萬九千一百五十九

集部

御定歷代題畫詩類卷五十一

閒適類

題茂安兄藏春圖

宋范浚

春入名園何處尋東風引步上崎嶇平凝四面雲嵐合
曲折一丘花木深碧草華滋迷絕徑綠蘿陰影護芳林
韶光向此知歸處長與先生供醉吟

展子虔遊春圖卷

元張珪

東風一樣翠紅新
綠水青山又可人
料得春山更深處
仙源初不限紅塵

展子虔游春圖

明宋濂

冰解泥融生水濶
初葩穠豔未應殘
天桃噴火柳金嫩
深谷鶯啼聽且看
花影淡梳顰粉媚
春暖野郊風細細
游人醉以天爲幕
酩酊陰濃春雨被
行來樹下實相叅
瞑目無言心自慙
黃蝶逐風翻上下
賞花此處更停驂

春遊圖

明卞榮

遊絲百尺蕩空濶
天上有人落白髮
人生行樂及少年
金縷一聲杯百罰
翩翩兩騎出郭東
桃花如雨吹東風
願倩遊絲絆西日
不教便入咸池中

題春日玩芳圖

明
汪廣洋

杖策花樹間
拂石花樹下
攜辭妙天趣
緩步及時暇
芳洲漾清波
老鶴散春野
眷彼圖中人
終非避秦者

園池春晚圖

明
楊慎

方塘含廣漪
名園饒雜英
花蟲丰茸戲
水鳥間關鳴
啁

浙既萬態藿靡又千名錦純奪豔色笙簧無雜聲聲色
知可翫冶遊空復情青雲從東駛白日向西傾

家藏馬遠春山行樂大幅

明 祝允明

淑候媚川石初景澹林霏扶藤循石坂楊柳共依依朱
絃臥行襖隨往抱希微無論遇高賞器在道無違

春園圖

爲廖侍御
德潛題

明 廖道南

青陽司令淑景遲郊園花木紛葳蕤縈絲裊絮自迴繞
奔蜂戲蝶相追隨憶昔君家楚烟水千巘萬壑含蒼紫

衡嶽雲流虎豹棲，星沙波湧蛟龍起。
自從移居漆水濱，歲華迢遞懸心神。
木奴千頭洞庭曉，竹君萬箇瀟湘春。
忽看簪筆承明殿，南宮西苑霑清燕。
太液池邊玉樹芳，芭蕉園內瓊芝燦。
曾聞周雅歌螽斯，瑞氣祥光滿御墀。
願將此圖獻天子，長樂長春萬壽卮。

一徑野花落孤舟春水畫

明張寧

林外春陰曉風作，門徑幽深野花落。
東家春色過西家，井口籬根亂漂泊。
溪頭新水繞門生，扁舟一葉輕如萍。

杜陵老病烟波遠
欲載詩愁過洞庭

春野圖

明徐渭

北門之外多佳麗
白水茫茫遶天際
中有幽人春野翁
摘荷採芰紉衣袂
春野讀書曾萬卷
只今一字不欲看
只將元氣手中調
不許紅塵眼中散
昨者鑄鼎鍊九還
吾欲從之乞一丹
青牛在田不肯語
輕蓑大笠天將雨
紫極宮深景氣秋
脩脩牕竹發詩愁
謫仙千古風流句

題朝元宮劉道人秋聲圖

二首

元

王惲

輸與歐公作巧偷

少年心事讀書臺
涼入郊墟亦快哉
星漢在空人未寢
一聲猶憶樹頭來

山樓秋望圖

元吳師道

荒厓蒼蒼映高樹
樹缺飛樓秋色露
樓中有客獨凭時
溪上何人却歸去
風埃低垂傷我顏
嗟爾乃得專其間
晴牕掩卷意未已
一夜夢遶江南山

萬港秋汎圖

元張翥

小史堞前烟水空
淮山無數直叢叢
使君援筆寫秋色
舟子唱桹乘晚風
幾處漁家依落木
半汀殘照下飛鴻
白雲望斷仙遊遠
應在蓬萊碧海中

題馮文仲畫秋亭野望

元

姚文奐

黃葉蕭蕭聲自雨
西風夜作離人語
秋亭野色滿江南
誰擣玄霜千萬杵

題王明府歷下秋興圖

明

汪廣洋

點綴秋容亦費思
芙蓉泉上晚晴時
景於佳處煩清賞

興到無聲絕有詩天外好山來隱隱雲邊歸鳥去遲遲
更憐箕踞哦松者多是長安杜拾遺

謝庭循自畫秋景

明王直

洞庭八月秋風早楊柳蒹葭漸應老柳下茅堂遠市廛
寂寞閒門對幽島居人無事不出門林深地僻如荒邨
門前道上車馬絕過雨蒼茫空蘚痕江清水落沙石出
水底渾疑見鮫室鷺鷥鸕鶿皆有情唼喋喧呼亂晴日
我家故業連滄洲贛水文溪遶舍流圖中景物渾相似

見之令我增離憂君今善畫得供御下筆縱橫有神助
何時爲埽寰瀛圖一葉凌波向南去

倪雲林秋林野興圖

明 吳 寬

經鉏堂前木犀黃何人晏坐聞天香迂翁胸中有清癖
欲摘繁花歸枕囊秋林野興圖親寫百年零落燕都下
市門不遇杜長垣殘墨誰將手重把

聽秋圖

明 謝承舉

依回生遠水飄颻起疎林未入臯魚耳先傷宋玉心一

天韶戛玉萬籟氣澄金欲廣隨州賦苔東客思深

李學士薇園秋霽圖題贈

明嚴嵩

玉堂仙人入直還盡日閒園惟閉關展席平臨階下樹
開簾遙對几前山紫微陰深日卓午石榻微涼遇鳴雨
磴道聲飛泉瀑寒雲根色颭莓苔古仙人步履出幽林
長嘯時逢鸞鳳音手揮綵筆吟芳杜目覩飛鴻彈素琴
琴書偃傲有餘清竹窓今夜月華明誰言西掖絲綸貴
更有東山蘿薜情

東嵐秋思

爲江田謝家題

明

李叔玉

東嵐別是一人寰
烟水蒼茫島嶼間
猿嘯空林朝霧薄
鴻歸斷渚夕陽殘
漁人尚識桃源路
樵子還尋石室山
桑梓別來今已拱
不知遼鶴幾時還

題李將軍四時行樂圖

明

丘濬

春游細柳

日華淡淡雲陰薄
兵衛森森擁鈴閣
旌旗不動柳風輕
劒戟無聲花雨落
將軍新試越羅衣
兩袖春風拂地垂

閱遍三軍超距樂晚涼乘興詠歌歸

夏坐松林

松風流響團涼影翠濤翻空火雲冷一軍無事枕戈眠
萬馬不嘶清晝永將軍燕坐凝清香靜對珠鈴萬慮忘
不用更揮諸葛羽溶溶心月自生涼

秋郊挾彈

霜染楓林秋氣肅潦水收痕山露骨蒼鳩一夜化爲鷹
百鳥含羞傍林麓將軍小隊出西郊金環壓轡青驄驕

霹靂一聲軍吏賀半空雲外落雙鷗

冬野行園

凍雲不飛朔風直野獸畏寒出還沒角弓鳴鵠起鷹飛
寶劍吐芒驚鬼哭將軍自控五花驄翩翩雲騎爭追從
射殺南山白額虎碧油幢底夜論功

衍聖公四景畫

四首

明程敏政

山前亭子萬松聲溪上桃花一樹明安得此中陪杖屨
時時閑坐復閑行

不愛紅蓮愛白蓮一塘開近綠楊邊
小童吹火翁尋句可媿江南罨畫船

一道澄江萬仞峰懷人相約采芙蓉
小亭坐納秋聲遠別浦征鴻隔岸鐘

獨裊吟鞭下水涯呼童回折暗香枝
遙知野徑詩成處正及山房雪霽時

題蕭彥祥四景圖

二首

明薛綱

昨夜東風入幽谷春草生香春樹綠
茅簷星散八九家

中有先生讀書屋讀書偏於靜處宜白雲堆裏長唔呿
只恐鳴騶陡然至好山却被英靈移

黃菊花開黃葉飛柴桑先生猶未歸蕙帳風高夜鶴怨
石梁水淺寒魚肥我亦天涯遊倦客對景徒爲增歎息
何由卜得柴桑鄰穩坐溪頭釣晴碧

題潘閬夜歸圖

金密公壽

不是詩人灞水孺又非野老曲江邊丰姿便認王摩詰
蘊藉還疑李謫仙驢背倒騎蓮岳下牛腰穩跨竹林前

掀髯對月餘高興明日佳篇幾處傳

吹笛圖

元虞集

白雲悠悠去長松披高丘匡坐吹笛人似是馬督郵飛
鴻遺哀響幽泉發春流女樂亦何有逍遙以忘憂

孤舟橫笛

王晉卿筆

元王惲

秋風葉下洞庭波橫吹歸時逸興多筆底分明詩外意
武昌南岸老人歌

蘆汀夜笛圖

明金幼孜

上下天光接水光滿汀蘆葉晚蒼蒼一聲長笛驚殘夢
明月滿船風露涼

橫笛圖

爲盧宏景題

明 劉泰

矗矗峰巒過雨新暖風吹綠半溪蘋從來不識塵勞事
輸與船頭弄笛人

題老嫗騎牛吹笛圖

明 范氏宮人

玉環賜死馬嵬坡出塞昭君怨更多爭似阿婆牛背穩
笛中吹出太平歌

題江南烟雨騎驢圖

元何中

風發發雨蕭蕭渡船未渡山相招騎驢不知前路遙路
遙抵何處南山之南且穩住莫向長安街上去京尹今
無韓吏部

題畫扇騎驢踏雪

元陳深

雪沒驢腰白行行詩興催不因太清絕那肯犯寒來

雪騎圖

元程鉅夫

都城五月已炎歊咫尺西山迹漫遙何處只今如此雪

煩君小住我聯鑣

題劉凝之騎牛圖

明戴良

日落未落西山前誰家老翁牛背眠短身曲局聳兩肩
山花插帽帽爲偏左手拊牛右捉鞭牛行不動穩若船
一童衝冷手握拳迎風鼓勢走欲先荒郊冪冪草纖纖
云是匡廬古道邊匡廬山水好盤旋此日劉公初掛冠
劉公作今天聖間民物熙熙德化宣世上浮榮值幾錢
白髮東歸耕石田當時出處亦偶然乃留遺迹後人看

長安城中足豪賢車騎駢羅氣灼天一朝變滅如雲烟
姓字寥寥若箇傳我觀劉公差獨賢

劉凝之騎牛圖

明高啓

夫子初亦仕絃歌潁之湄園廬忽在念解綬言歸期方
春養孤犢既耕亦以騎春風草茫茫出遊徧山陂田家
有美酒輒醉不復疑當昔天聖間實號休明時豈無理
人術終懼塵鞅縻嗟今屬喪亂懷策競欲施清芬遠莫
挹載誦廬山詩

題停車圖

明 張鳳翼

炊烟密氣亘升沉
石澗流泉響玉琴
莫怪山中少推轂
停車元是愛楓林

曉起圖

明 唐寅

獨立茅門嬾挂筇
鬢絲涼拂豆花風
曙鴉無數盤旋處
綠樹枝頭一綫紅

閣下觀竹筍圖

宋 孔武仲

我家廬山下綠竹常陰陰
春雷迸狂籜萬點羣玉簪
別

來經歲時脫肉塵土侵歛見此圖畫醒然豁煩襟方幅
藏萬里環以青山岑旁飛清泠泉下有瀟灑林恍惚如
夢到杖筇聽幽禽欲投環堵室浩渺忽難尋人生諒自
苦一官詠蹄涔搖尾增光華豈知滄海深虞卿銜白璧
季子夸黃金貪得以忘我俱非賢達心何如返鄉國坡
塢窮差參茅簷當天風時聽笙簧音

題僧法傳爲沈仲一畫聽松圖

宋 陳傅良

古松不知幾千年直榦欲上千青天樛枝下與人世接

冷風過之萬壑喧
猿驚鶴怪樵牧遯
百鬼愁絕誰傍邊
紛紛海內絲竹耳
何處縹緲來臞仙
整襟拱聽移永日
置琴弗顧僮敲眠
松風有際意無盡
莊騷不數惟易玄
嗟乎深山大澤松
不乏斯人徃徃千
載之陳編筆端若
有夜半力一日忽
在軒楹前止齋虛
靜對立久晴昊亦
爲生蒼烟畢宏韋
偃骨已朽畫工一
世脂粉便北湖居
士安得此奄有二
子雲山傳北湖居
士雲山傳吾詩孰
與杜老起九原

聽松圖

元 張 憲

洪巖羽士氅衣輕
腳踏青鸞下玉京
直壁倒懸松萬尺
盤陀石上聽秋聲

溪行看松圖小卷

明 李日華

閣外雲山隔岼峰
去帆漠漠帶雲容
新涼喚起蘋花夢
緩步來看拂水松

跋張龍丘簪花圖

元 王 惲

醉吟賞盡洛陽春
老與坡仙作近鄰
未礙一枝長在眼

靜庵方寸本無塵

龍丘子晚居黃岡號靜庵居士與東坡爲鄰

雪樓探梅圖

元

程鉅夫

竹樹參差老不才
四山壁立雪皚皚
凌寒何許龍鍾老
獨對梅花待酒來

種柳圖

元

楊載

連山斷岸古今同
髣髴柴桑入望中
爲問江邊枯柳樹
飛花幾度亂春風

觀桃圖

奉寄高憲副宗選

明

姚綬

仙人種桃處碧山白雲中枝頭遲日暖葉底繁花紅步
入古苔坡漸得芳草路光風散晴霞香雨消薄霧西池
有碩果一實三千年願公采食之笑拍洪崖肩

題金華宗原常雙溪洗藥圖

明 吳 溥

洗藥臨溪頭水流溪尾香居人飲溪水百年躋壽康石
路曲盤蛇山花如錦黃日暮攜藥歸香風滿衣裳

採芝圖

明 張 泰

山中過雨藥苗肥野老尋芝踏翠微紫豔隨風迎曉杖

冷香和露濕秋衣
石田雲淺無勞種
蘭徑人稀自擷歸
得向清時養眉壽
療飢寧羨首陽薇

白雲深山掘芝者

明徐渭

天外白雲必爾家
微紅雙頰飽朱砂
神仙豈是靈芝得
枉用鋤鉏壞紫霞

羣兒春嬉圖

明陳洪謨

暖風鼓繡帽霽色稱華裾
拾翠郊原徧欣然共小車

童戲圖

明倪謙

曲闌護春小園內芳草芊緜織新翠屏山牡丹開暖風
吹墮輕紅粉香碎誰家兒女蜀錦襠柔髮初剃靛色光
兩兩三三戲晴晝歡呼競出花臺傍鞦韆木架雙旗插
綵繩低垂畫板滑向前推送身轉高架上連環韻鳴軋
脚尖背蹴香塵飛珠汗微沾金縷衣丹青假面恣塗抹
舞腰更把爛斑圍嬌娥並坐遺鍼線手弄折枝情戀戀
花腔小鼓閒不敲竹馬金鐃拋地徧玉蛺蝶撲蝶意自癡
紫蘭綠葉紛離披君不見聖主仁恩致蕃育四海民物

陶春熙

題管夫人山樓繡佛圖

明 邢侗

竹繞層樓罨網蛛絲絲縷縷貌雲瞿倦來素面流輕粉
尚憶羊肝半臂無

題月夜送花圖

明 陳繼儒

藹藹樹交巖澗凝凝月上亭臺卷幔忽聞荷氣開門客
載花來

御定歷代題畫詩類卷五十一

欽定四庫全書薈要

御定歷代題畫詩類卷五十二目錄

閒適類

和姜伯輝見贈醉吟畫詩

宋郭祥正

范寬筆

宋朱子

李昭道畫卷

元鄧文原

李昭道畫卷

元吳鎮

馬和之卷

元吳鎮

題趙仲穆畫送鄭蒙泉之鄆元吳鎮

題馬遠畫元陳旅

朱澤民畫元鄭元祐

題畫元鄭元祐六首

題倪元鎮畫元陳基

題畫元倪瓚十八首

題魏明鉉畫元鄭韶

題畫元貢性之三首

題畫扇

元錢惟善

大年便面

元郭昇

題天游畫

元華幼武

題陸某寄元暈詩畫

元華幼武

題張道師所藏畫

元周砥

顧雲屋畫

元唐肅

畫意

元馬臻十三首

郭天錫畫卷

元張雨

題人物山水

元陶宗儀

題畫

明陶安

畫爲包師勝題

明楊基

畫

明張羽

畫

明王行二首

題畫

明張紳

題畫

明葛孔明

爲彥中題畫

明龔翊

題畫 明王燾

爲沈趣菴題畫 明偶桓

題畫扇 明陳顥

題畫 明陳憲章二首

題畫 明徐溥二首

題許廷冕職方畫 明李東陽

雜畫絕句 明李東陽二首

題畫 明吳寬二首

題畫 明王雲鳳

題畫 明文森

郭天錫畫卷 明黃玠

題畫 明羅宏

題畫 明賀甫

題畫 明唐寅

題畫 明周用三首

題張性夫小景 明顧清四首

畫意 明孫偉

小畫 明顧璘二首

題畫 明寇天敘

看畫口號 明湯顯祖

題畫 明董其昌三首

題畫 明陳繼儒

丙寅四月仿燕穆之畫湯可卿扇 明李日華

題畫 明李日華三首

欽定四庫全書薈要卷一萬九千一百六十

集部

御定歷代題畫詩類卷五十二

閒適類

和姜伯輝見贈醉吟畫詩

宋郭祥正

蒼崖一萬丈中瀉白玉泉飛鳥度不得而我長攀緣洗
盡心地垢吟成元化篇更復有何物一尊當我前忽逢
姜伯輝爽量涵冰淵開談了無迹所得全於天便欲脫
青衫泛我江東船結交要終始相忘復頽然徑呼妙手

畫秋江霜景全冰輪正卓午照影無陂偏誰能騎蹇驢
世路空流連咄哉可以往揮手從飛仙

范寬筆

宋朱子

山雄雲氣深樹老風霜勁下有考槃人超遙得真性

李昭道畫卷

元鄧文原

松篁寂寂掩幽居一段清幽樂有餘麋鹿自來尋舊迹
高賢還去賦歸歟千山夕照耕初罷隔樹炊烟誦自如
有客臨溪清話久數聲長笛過前畬

李昭道畫卷

元 吳 鎮

人愛山居好何如此際便家規仍小異幽致更超然莫
靄映高樹柴扉繞細泉新圖不可再展閱憶唐賢

馬和之卷

元 吳 鎮

青峰互合若爲羣中有高人臥白雲颯颯松風從澗出
蕭蕭竹色過橋分閑來欲覓知音伴睡起還探頌酒人
一段清幽離塵俗不禁長笛起前濱

題趙仲穆畫送鄭蒙泉之鄞

元 吳 鎮

海寧太守歸來日愛寫新圖入臥遊見說甬東風日好
春山如霧隔瀛洲

題馬遠畫

元陳旅

屋角東風吹柳絲杏花開到最高枝春來陌上多塵土
此老醉眠多不知

朱澤民畫

元鄭元祐

窈窕溪橋路陰森楓樹林岸隨青嶂轉家在白雲深畫
史分明意山人去住心勞形何日已於此欲投簪

題畫六首

元 鄭元祐

舒嘯風林雲滿谿白駒空谷草萋萋相逢不作蘇門聽
應有長松鶴未棲

濯足清溪水已寒青山猶有此衣冠黃塵三尺烏韉底
誰與歸來把釣竿

水繚山迴深復深白雲茆屋住溪陰溪南十畝堪耕種
何必囊中季子金

桂樹連蜷山石幽蕭然冠屨白雲秋只愁畏壘無尸祝

不媿長年爲爾留

桃花源上蝶飛飛誤却漁郎苦欲歸雲白山青一回首
落紅如雨點春衣

仙人樓觀隔層霞隱者烟蘿便作家萬壑千巘何處是
停梳試問碧桃花

題倪元鎮畫

元陳基

西池亭館帶芙蓉雲水蒼茫一萬重此日畫圖看不足
滿簾秋雨夢吳淞

題畫贈王仲和

元倪瓚

曾住南湖宅於今已十年叢筠還自翳喬木故依然雨
雜鳴渠溜雲連煮朮烟何時重相過爛醉得佳眠
題畫贈張玄度

元倪瓚

蕭條江渚上舟楫晚相過卷幔吟青嶂臨流寫白鷺壯
心千里馬歸夢五湖波園石荒筠翳風前發浩歌

畫寄王雲浦

元倪瓚

蕭散賢公子衡門似水清花間青鳥過砌下綠苔生山

色排簷入江波照眼明開圖想幽境欲爲寫閑情

題畫

贈呂彥貞

元倪瓚

江上秋雨晴泊舟烟水汀孤吟誰和予悠悠蟪蛄鳴故人邀我留三宿荳畦蘿逕居幽獨松醪陸續酌山瓢燈影縱橫寫風竹水光雲氣共悠悠鶴思鷗情樂此留無褐無衣悲骭髀三疊三沐嗟咿嘵君自息機江上住我且沿洄從此去圖訖新詩草草裁眼前流光水東注

題畫

六首

元倪瓚

雨過黃陵廟下雲生玉女井邊野雉雌鳴斜日鷓鴣啼
破林烟

月下參差雙玉燈前蕭散孤鴻寄興只消毫楮寫懷不
用絲桐

竹上誰彈清淚如鉛春雨斑斑滿眼湘江波浪望窮白
鳥飛還

高樹長松共晚蒼筠野石同貞珍重王家公子翩翩白
鶴神清

高柳喬柯小閣水光山色衡門未老作閑居賦無錢對
北海尊

孝侯廟前雨過晷畫溪頭日曛舊迹如今夢裏春風愁
亂行雲

畫贈馮文仲

元倪瓚

知君佳近西湖曲湖水淪連似輞川窓下青松高百尺
時時落雪滿琴絃

題陳仲美畫

次張貞
居韻

元倪瓚

杜老茅堂倚石根
往來西瀼與東屯
一庭秋雨青苔色
自起鈎簾盡綠尊

斜日西風吹鬢絲
披圖弄翰學兒嬉
釣竿拂著珊瑚樹
張祐題詩我所師

題畫二首

元倪瓚

南望銅官曉色新
三株松下一茅亭
何當濯足臨前澗
坐石閑書相鶴經

坦腹江亭枕束書
澄清江水自空虚
修簞古木悠悠思

何處青山可卜居

題小幅畫

元倪瓚

複谷迴巒地沈寥
參天老樹拂雲霄
幽人樂事知多少
拖杖尋詩過板橋

題扇畫二首

元倪瓚

荷葉田田柳弄陰
菰蒲短短逕苔深
鳥飛魚躍皆天趣
靜裏遊觀一賞心

一代舒王不數人
曾哦雪竹與霜筠
雲林野思生幽夢

睡起濡毫一寫真

題魏明鉉畫

元 郊 韶

老翁住在浣花邨
日日哦詩醉瓦盆
怪底橫江見船尾
不知春水到柴門

題畫

元 貢性之

石瀨清冰合
黃山白戰鏖
道人禁得冷
扶醉過溪橋

題畫 二首

元 貢性之

桃花紅綻斷橋邊
楊柳垂陰散綠烟
記得少年曾取醉

玉人扶上總宜船

一江春水晚微茫
醉倚蓬窗客思長
忽聽簫韶雲外落
松風輕度鬢絲涼

題畫扇

元 錢惟善

銀氣蒸成雲白嵐
霏散作空青中有幽人小
隱松風澗水泠泠

大年便面

元 郭畀

疎雨灑荷氣微涼
生柳陰閑亭不受暑
坐占清湖心無

客且罷碁有風宜披襟向來行路錯足底黃埃深此意
一領略落日孤蟬吟

題天游畫

元
華幼武

仙翁醉倒金壺汁信筆塗糊作畫看泉合松聲流別澗
雨將雲氣出層巒移家隱遯懷龐老攜妓登臨憶謝安
一笑頓忘塵世事也須卜築老江干

題陸某寄元翬詩畫

元
華幼武

新詩遺明珠清圖寫寒玉二美從何來天風墜茅屋屋

下有佳士孤吟坐煩促披圖誦新詩悠然坐巖谷瞻彼
江上雲飄飄謝羈束夕影弄明月朝光泛晴旭念茲塵
埃客可望那可逐願將綠綺琴同歌紫芝曲

題張道師所藏畫

元周砥

秋月無風度海遲珊瑚玉樹碧參差明朝我亦三山去
爲借韓裋白鹿騎

顧雲屋畫

元唐肅

江際石林秋閑來伴客遊獸茵鋪接膝鳩杖倚過頭峰

對千重色潮聽一派流話多論隱趣身不近閑愁縹渺
雲生瀨參差樹隱洲無端破幽悶飛去一雙鷗

畫意十三首

元馬臻

千樹萬樹桃花發三聲五聲鷓鴣鳴溪山春色媚人眼
但見物物生詩情

寒空黯淡飛鳥沒某丘某壑同一色絕憐驢背苦吟人
風雪打頭烏帽側

紅塵堆裏顚低顏石路迢遙入亂山擬向雲邊種黃獨

幾時容我屋三間

支筇路入諸峰頂回首繁華謝朝槿古來天下多名山
不是終南終不隱

江花江草映江樓寫出江天一片秋隔岸小橋低數尺
淡烟消處見漁舟

千章古木見青紅路接溪橋出暮鐘衰老無人賦招隱
山雲更入兩三重

吳儂生長浙江干慣見秋濤拍夜灘老去怕風兼怕水

不妨傳入畫圖看

有客騎驢入林麓山深疑是王官谷平生輸與釣魚翁
獨木橋邊結茅屋

數間草屋山烟靜夾岸桃花流水香愁殺武陵回棹客
不知人世幾斜陽

平生丘壑老棲遲敢信毫端爲發揮忽憶楚江江上見
雙帆帖帖帶雲飛

幽人自樂山中趣閑訪山家入山去記得西峰阿那邊

亂雲遮斷無尋處

江雲晶晶侵林影
境會心融發深省
可惜長艘載利名
乾坤清氣無人領

緣溪路滑蹇驢遲
水色山光總入詩
還勝襄陽孟夫子
滿身風雪灞橋時

郭天錫畫卷

元張雨

林間風雨避籃輿
城頭鼓聲知有無
只消深淺屏風疊
題作蘇卽詩意圖

題人物山水

元 陶宗儀

古賦裁成學遂初
山童研墨且徐徐
石頭几上溪藤滑
旋拂松花對客書

題畫

明 陶安

鼓罷瑤琴策杖還
空山流水聽潺潺
夕陽林外風塵起
輸與先生不出山

畫爲包師勝題

明 楊基

疎簾半捲絲絲雨
菱葉荷花暗江渚
水近松深徹夜涼

不用開襟搖白羽
隔岸人家住綠陰
偶來聽我坐彈琴
聊將白雪倚蘭意
銷盡紅塵汗馬心

畫

明張羽

疎散元非用世才
日高林戶尚慵開
爲憐湖上青山好
行到冬青樹底來

畫
二首

明王行

高館疎簾晚乍開
讀書聲裏故人來
山中本自無塵土
催得家童埽綠苔

雨後飛泉下碧湍長松修竹草堂寒無人解識高人意
溪上青山獨自看

題畫

明
張紳

高樹漏疎雨滴瀝下銀塘美人捲簾坐寶鴨添生香風
吹綠荷葉露出雙鴛鴦

題畫

明
葛孔明

結屋高人占一邱閒行小立俯清流青山落手誰爭得
一片詩情在杖頭

爲彥中題畫

明 龔 翊

青山之青如佛頭白雲化作寒泉流世間塵土飛不到
眼中景物俱清幽若人自是好靜者豈非五柳先生儔
每託琴尊寫高興脫屣樂從魚鳥游却笑時人苦不達
漏盡鳴鐘猶未休君不見小虞塘西玉峰下一菴已遂
吾菟裘共論心事肯相過斗酒當爲山妻謀

題畫

明 王 燧

渡頭初唱采菱歌南浦西風漲綠波正是晚涼新雨後

青山不似白雲多

爲沈趣菴題畫

明 偶 桓

溪山深處野人居
小小簾櫳草閣虛
酒面松風吹夢醒
凌霄花落半牀書

題畫扇

次岑
琬韻

明 陳 顥

自適閑邊趣
誰言分外求
看山一瓢酒
載月五湖舟
秋水清吟思
西風冷釣裘
惟應陸甫里
千古可同流

題畫 二首

明 陳憲章

水面田田荷葉墻頭纂纂東花士子贈之以藥女也不
績其麻

隋苑螺橫山黛吳門練曳溪紋石橋糝徑紅雨草閣鈎
簾白雲

題畫二首

明徐溥

一聲啼鳥春林曉轉覺草堂深更幽底事東風太相狎
飛花吹滿硯池頭

向時載酒江東去今日山陰載雪回一片閑情誰解得

晚風溪上破疎梅

題許廷冕職方畫

明

李東陽

路轉循岡背橋回傍水根幽人不到處茅屋自成村
浦樹經秋落山鐘向晚昏偶然一攜手相與倒芳尊

雜畫絕句二首

明

李東陽

雪滿千山路茅堂只數椽幽人與修竹相對不知年
春岸桃花開江頭夜來雨偕問垂釣翁中流深幾許

陸天游畫

明

吳寬

脩然掩陋室幸此絕塵鞅偶開水墨圖頗慰山林想危
岑瞰深碧湖水平於掌喬木四五株秋氣始蕭爽不逢
弄舟人似聽伐木響二老足高致多暇自來往落照變
巖姿臨流更欣賞

題啓南畫

明
吳寬

閉戶蕭然亂雪中已無賓客晚堂空
槁梧獨據忘爲我老筆能揮愛此公
却構石欄臨絕澗似聞茆屋卷秋風
十年別却西莊路歲莫相思白髮同

題畫

明 王雲鳳

草履麻衣也自華
杖藜徐步定誰家
山人欲訪岡頭竹
厭看春來市上花

題畫

明 文 森

石上收綸坐垂楊
拂鬢絲閑情與幽思
不復許人知

郭天錫畫卷

明 黃 玠

門外馬蹄三尺塵
屋底青山看白雲
不知身世在城市
但覺爽氣吹冠巾
鴨嘴灘頭露沙渚
彷彿西陵與漁浦

惱人歸興滿江東
烟樹半沉天欲雨

題畫

明羅竑

入山採靈藥
山深愁日短
空林獨自行
木客時爲伴
木肥晨露滋
芝潤春泥暖
荷鏤莫歸遲
前溪白雲滿

題畫

明賀甫

畫舫西湖載酒行
藕花風度管絃聲
餘情未盡歸來晚
楊柳池臺月又生

題畫

明唐寅

春風修禊憶江南酒榼茶鑪共一擔尋向人家好花處
不通名姓即停驂

題畫二首

明周用

楓葉野亭陰蘋花沙岸雨秋光絕可憐誰與幽人語
秋葉亦自紅谿雲閑且白客從何處來坐我松上石

題畫

明周用

步入清谿陰秋色亦可悅采采菊垂花蕭蕭木落葉飄
風吹衣帶古蹟戴石轍偶爾聞鳴猿東山欲生月

題張性夫小景四絕句

明顧清

寂寂空山裏春和草自芳
隔溪人不見髣髴喚劉郎
水木陰森處茅堂四五間
主人容直造攜手看青山
秋氣著林麓蕭條門戶閑
兒童拾松子日暮不知還
積雪斷山路柴扉晝不開
明朝稍晴霽先看屋東梅

畫意

明孫偉

野行不出遠步入橋之東
雨晴農事盡水邊村徑通
所欣挹澗人翫心於此同
坐看薄雲生婉媚桃花叢
柴門

澹松桂雞聲鳴午春幽懽適天性送目春飛鴻孑然吾
得我意在忘言中

小畫二首

明顧璘

斜日雲橫薄莫空江木落高秋雲外稻梁自足世間矰
繳何求

澤葦江楓共遠玄鳬白鷺爭飛借問漁舟安在欲來垂
釣忘歸

題畫

明寇天敘

十月梅花開已多
寒驢衝雪野橋過
亦知金紫趨前貴
奈此當前清興何

看畫口號

明 湯顯祖

何處三公指向空白頭
西笑日東紅三公
久視如相識
烏有子虛無是公

題畫

贈張山人二首

明 董其昌

炊烟連斷靄
隱隱見松亭亭
中有靜者單
讀淨名經
烟渚輕鷗外
晴巒畫鷁前
何須苦聯句
觸眼白雲篇

題畫

贈眉公

明

董其昌

何處江山好定居卜鄰真擬傍專諸騷人已落芝蘭事
濠叟猶傳說劒書

題畫

明

陳繼儒

酒甕嘈嘈杞菊香解衣松下月清涼年來數畝山田熟
半作花錢半鶴糧

丙寅四月倣燕穆之畫湯可卿扇

明

李日華

山晴烟晚綠濛濛
麥隴香來花片風
欲向溪南放黃犢
酒瓢詩卷挂墻東

題畫扇

明
李日華

夢壓春愁睡起遲
一林疎雨褪胭脂
詩翁艇子無人見
只有飛來白鷺鷥

沈天生求畫扇題

明
李日華

車馬風塵屬壯時
得閑今不恨閑遲
泉光雲影虛亭畔
定不將人染鬢絲

爲天鏡上人畫扇

明
李日華

飛錫看山猶不足
又將幽思惱幽人
一泓墨汁曹溪水
灑落秋光一點塵

題畫與月樓上人

明
李日華

松響半天環珮澗
吹滿耳笙簧知是前生迦葉
空山容我疎狂

題畫三首

明
李日華


秀壁疎林野水涯
亂雲堆裏隱人家
一泓淡墨閑情緒

消取清泉白石茶

沙隱人家樹隱橋一湖春水接天遙
虛亭盡日無人到
勝有風帆拂柳條

繡晴洞徹虬蟬字白葛偏宜鷗鷺羣
莫怪咿哦山谷裏
要將清響徹松雲

御定歷代題畫詩類卷五十二



總校官庶吉士臣侍朝

校對官編修臣裴謙

謄錄監生臣蔣瞻崧